

乾隆杭州府志

杭州府志卷八十九

人物 四 循吏四

國朝

何元瑞字穎凡富陽人順治二年由貢生授安慶通判時
土寇未靖民多逃亡元瑞多方賑濟民德之漕艘分民運
軍運譁然靡定元瑞以民運必貽累于民因子巡撫前痛
切言之遂著軍運爲定制署桐城縣篆重士愛民輕徭減
賦以親老告歸卒年七十六祀鄉賢祠

鄉賢留
祀冊

駱鍾麟字挺生號蓮浦臨安人順治丙戌舉人丁亥會試
副榜知盤屋縣性和易喜與士大夫相接李願講學里中

鍾麟尊以師禮往復不倦邑城北去渭不十里鍾麟循行
河畔知水勢將南侵議自覽家寨迤東開復古道衆難之
不果康熙元年夏大雨渭水南溢將及城鍾麟率僚屬跽
雨中爲民請命久之雨漸止水亦頓減又徙而北流者數
里人以爲精誠所感

陝西通志

康熙八年遷常州府爲政簡易

近民有訟者輒懇惻誨諭九年大水遍歷四鄉勸賑十年
大旱葛衣草屨步禱數日不應乃躬詣郡獄日食糲飯一
盂菜一七引咎自責聞者感動建延陵書院率士大夫會
講其中以艱去郡人思之祀名宦

常州府志

俞有章字紀方號易菴上虞人錢塘籍順治丙戌舉人乙

未會試副榜授淮安推官發奸摘伏善于平反淮爲南北孔道舊例漕艘過淮官吏率受其餽遺有章不受遇有犯輒繩之以法軍不敢漏弁不敢漁擢禮部儀制司主事巨細事例旁搜博採有所條畫多見施行尋致仕歸

錢塘縣志

吳道煌字瑤如錢塘人順天籍順治己丑進士任武康令武康山邑無城郭爲劇盜窟穴道煌下車飭保甲詰奸宄悉罷諸掩捕令治期年無犯境者已補官閩中以卓異召擢禮部郎出守蘇州郡新立駐防兵旋奉部撤回以舟楫資裝不能具咸觀望不卽去巡撫問道煌道煌曰禁兵驕則民受其禍計惟召諸守協濟以速其去請先具屏屨集

餼糧且曰太守爲諸軍祖道勿逗留獲愆萬艘一夕發吳郡財賦甲天下故事分解諸部寺內外吏因緣爲姦長吏多得罪去道煌建議當歸戶部法始畫一有巨家以他事牽連慮不測以家釀進發之皆珠也力却之且爲雪其罪有妄男子指怨家通洋株連數百人道煌驗其海舶叱曰誣也凡海舶必用巨木長數尋貫首尾曰龍骨非此不行無則民間江湖細舟耳竟從末減在任五載郡人德之立

祠于虎邱

錢塘縣志

胡應淳臨安人順治中由貢生知豐縣事有清勤敏之稱時有巨愍司桓犯大辟賂以千金應淳不受力治其罪捐

貴創書院又置田以供廩餼土風丕振考滿擢冀州守值

歲旱步禱傷暑卒于官

臨安縣志

弟應澍順治己丑進士累遷

廣西桂林兵備道時大饑應澍自楚載鹽二艇糴米三千

斛以賑治兵撫民恩威並用稱爲粵西福曜以勞瘁卒

廣西

通志

許遴字聿求海寧人順治戊子舉人就銓試主者奇其文

拔第一人爲知州得楚之均州甫下車訪官民積弊五六

事陳督撫多所釐革武當山爲羽士窟穴鉤結緊援守土

者莫敢摘其奸遴急懲以法爲所譖遂罷歸

德星堂集

方躍龍字去寬於潛人順治己丑進士授湖廣華容令華

土瘠而衝賦重役繁躍龍竭力撫集治稱最遷臨洮府同

知

於潛縣志

吳雯清字方連號魚山歙縣人仁和籍順治辛卯試浙江中式明年成進士官潯州司李時粵西初開官無廨舍結茅而居容色自若會峒寇薄城下民驚竄雯清堅守不爲動城賴以全未幾寇引兵窺潯兩臺將勦之雯清不可單騎入賊壘曉以大義寇皆懾服來降交章薦之行取江南

道御史

歙縣志

鮑經綸字欽生歙縣人錢塘籍順治辛卯舉人已亥會試副榜授鞏昌知縣縣在萬山中軍民番夷雜處經綸釐治

有法民便之壬子秋淫雨飢饉經綸單騎三赴皋蘭泣陳其事始得具題隣邑亦邀其庇竟以勞瘁卒于任

錢塘縣志

陳兆勲字天叟海寧人順治辛卯舉人從征有功署上杭

知縣加意撫綏流亡日集海疆晏然將錄功會病卒

海寧縣志

伍九官字虞賓於潛人順治八年由貢生授陽武知縣性

勤敏凡所興築悉協輿情邑瀕河素患圯決九官悉心濬

塞尋以疾卒于任

於潛縣志

錢世清字生一仁和人順治中由貢生授中書舍人循例

遷戶部郎晉僉事備兵南韶值靖南王移鎮水陸役夫至數十萬州縣束手世清詣其營閱甲兵士卒實數汰其無

名者然後出金僱募民爭爲之役南韶近海海民以南洋爲窟穴蠶船上下多竄奸宄爲大盜耳目事發輒牽引無辜輿緩其獄世清條牒諸吏約束之一境不敢犯清遠鎮將劉某素貪殘誣民剝刦擅發卒擒男婦百餘人掠治事下世清一訊卽破械遣歸且具言鎮將殃民狀鎮將服罪去尋以裁缺歸未幾起補永平分巡道改通永道通州密通京畿旗民雜處世清調劑得宜軍民懾服以親老請養卒于家

仁和縣志

吳百朋字錦雯錢塘人順治中由舉人授蘇州府推官蘇漕務刑獄最繁百朋用官收官兌法一切獄訟得平猾吏

歛手以簡抗得罪中考功法明年乃得白復補肇慶郡巡撫素知百朋名接之厚凡所興除得行其志會推官職裁補南和知縣其俗見廉明之吏士民咸標旗幟樹壁上旌之南和旗幟爲滿卒于官子鴈隨父治蘇州時顧咸建二子爲怨家所訐將召訊鴈見其牘請曰顧公賢令當十世宥此獄不足竟也百朋從之後百朋候勘抱沉疴鴈觸暑走金陵營救感疾卒年二十人稱其死孝云

錢塘縣志

查培繼字王望海寧人順治壬辰進士知東莞縣有政聲歷給事中出爲江西饒九南道時寇亂初靖培繼力事撫循尤以教化爲首務建義塾禁淫祀修白鹿書院時與諸

生講學其中既報最三郡士民爲建講堂辭弗獲乃改爲希賢書院取漢唐以來官于三州者得十四人而祀之自

爲記

江西通志

祝文震字稚明海寧人順治壬辰進士授評事遷部郎出爲淮海兵廵道淮處南北咽喉海波未靖文震撫兵足賦更理冤獄之沉抑者以身家保貰全活數百人如浙閩總督李子靜杭州太守嵇宗孟後著績效皆其前所申救中人也以疾乞歸

海寧縣志

沈貞亨字仲嘉海寧人順治壬辰進士授平陽推官刑清政肅再補臨洮遷夔州同知流氛未靖所在凋敝貞亨下

車後削奸宄撫遺黎席不暇煖考最擢守汾州旋得疾卒

海邦耆舊志

顧鼎銓仁和人順治甲午舉人知山西蒲城縣兵燹之後百計招徠民皆復業歲旱鑿石爲渠以資灌溉又廉得巨猾素爲閭里之害者置之法民受其惠子祖榮官內閣學

士

鄉賢留祀冊

查詩繼字二南海寧人順治甲午舉人知霍邱縣霍瘠土也詩繼加意撫字民賴以小蘇會上官督催科甚迫詩繼題元道州春陵行詩呈之有云民命直當惜守官良獨難上官讀之改容甫二載乞休士民攀留者數百人

海寧縣志

邵嘉字令如富陽人順治乙未進士歷督捕主事典試雲南督江南學政時每縣入學額止四名嘉每得佳卷不忍棄置卽捐俸代爲援例所歷學宮頽廢輒爲修葺都御史魏象樞疏薦晉鴻臚寺卿以終養歸

富陽縣志

柴望字秩于仁和人順治丁亥進士由知縣歷官廣東布政使嘗守萊州遇水潦捐俸賑粥鄰郡百姓襁負就食全活甚衆膠州知州與總鎮不協鎮兵譁然望親往安撫始定創築城東濠隄士民德之名其隄爲柴公隄

萊州府志

周甸字屆孚新城人順治丁酉舉人兩任教諭擢湖廣宜都知縣勤勸課革徭役慎聽斷絕差擾民咸便之會亢旱

虔誠步禱甘霖隨沛後病卒于官合邑感泣

新城縣志

徐奇桂字賓月臨安人順治丁酉舉人授陝西武功知縣性剛直以一邑興革爲己任不肯以民命媚上官故甚德于民而屢忤監司竟以鯁直遭彈劾去之日雖屠沽肩販皆頂香泣下數十里外遮道不絕

臨安縣志

俞灝字殷書仁和人順治戊戌進士授廣德知州有博徒許鎮之被刺死求賊未得其母訴其黨友坐抵灝拘視之曰此非殺人者悉置之乃虔禱于城隍廟夢神語曰殺人者十一人內四僧名德也灝寤入廟側天壽寺按冊點唱有沙彌名四德者詰之答曰某夜有劉十一者名本之薄

暮假宿浣足盆中曾有血腥灝曰本字乃十一人也收訊

果服

仁和縣志

翁世庸字用公錢塘人順治戊戌進士授思恩知縣遷隴州知州王輔臣叛秦隴震動世庸連上血書請兵未至城陷被執世庸不屈以死自誓

王師至賊驚遁去世庸走將軍營合兵進討以復隴州功擢知貴州廣南府兼攝學政廣南無城郭學校世庸教以禮讓沙人儂人咸知懷德繪迤東輿圖輯方畧備考進呈內艱服除補臺灣府未抵任卒

錢塘縣志

俞宣琅字雍來海寧人順治己亥進士知大竹縣邑經張

獻忠殘破居民鮮少宣瓊下車卽稽戶口墾田畝招徠撫循靡不至先是邑令公膳籍編戶按月供億宣瓊一切罷之疲民稍蘇歸籍者亦漸衆會以病卒貧不能返櫬邑民醵金送之始得歸

四川通志

朱昇字方菴海寧人順治己亥進士爲東昌推官定大案數十力主平反五載將上最適奉裁推官復除知縣得川南之峨嵋旋引疾歸

海寧縣志

姚舜藩字君屏昌化人順治十三年由貢生授太平府經歷有按察司吏犯罪密遺金六百堅不受號姚鐵耳當塗知縣擾民民亂執官道府帥兵往不能禁舜藩一言衆立

杭州府志

卷八十九

八

散

昌化縣志

高包諛字彥玉錢塘人順治初以諸生從征有功知仙遊縣移河南固始邑南北通六潁多盜東抵霍多強族西屬州多悍卒催科無術率鋌而走險包諛以爲非因勢利導漸漬以文教則財利機權之習難卒服也于是聚人士而噢咻之示儉示禮三年豪強輯而循謹者衆在任八載卒

錢塘

縣志

徐湘字月岸錢塘人有幹濟才授廣東長樂令小邑不知學湘爲立鄉校擇鄉進士爲之師召童子肄業其中捐俸給膏火由是邑興于學縣治南多深山複嶺爲盜藪湘乃

擇精幹吏僞爲賈販入其地與賊市久之盡得其主名旋
殲渠魁數人餘黨悉散有獲竊盜者湘問何故爲竊曰貧
無以養母湘乃賜之錢而遣之一富民兄弟爭財訟連年
不解湘至曉以孝友之道兄弟皆悔悟涕泣相讓歲旱發
倉米爲粥以食餓者又勸富民輸粟共濟尋以內艱歸

縣志

俞品字修遠錢塘人爲柳州通判治獄盡情詐以才能調
太平太平近交南所轄皆土司叛服不常品循撫有方恩
威兼濟擢河間府同知時漳水子牙河多衝決特設河員
用尚書薦以品董其事品爲修築隄防時加疏濬水患以

平又以水地多荒土教土人倣東南水田法布穀開墾給之農具闢田至萬餘畝百姓賴其利擢大名知府賑饑捕蝗屢有惠政卒于官民皆流涕爲立祠

錢塘縣志

洪吉臣字載之錢塘人順治中由進士授德安府推官時湖廣大旱德安尤甚盈路皆餓殍吉臣首出俸貲繼以借貸又勸富民共出粟米所在賑濟凡十有七次民賴全活德安士民作五仁五清之歌以紀其德

湖廣通志

洪秉銓字玉衡錢塘人由廕生順治中授嘉興同知值民變戕鎮帥總督張存仁移兵勦之命秉銓監軍請于帥曰逆命者止數人海鹽皆順民宜禁兵士毋入城一時慶更

生再任邵武同知建寧被兵秉銓固守府城賑流民之乞食者全活無算

錢塘縣志

陳履升字峻天錢塘人性孝友讀書目數行下客漳泉海冠圍城匝月升米數金有攜婦女求醫者或勸履升納之嘆曰可乘人危以自娛乎傾囊資遣之後授浮梁縣丞布政姚啟聖一見奇之曰小吏中乃有此人畱之軍前俾司輸輓軍需賴以濟及抵任鬼環署而哭履升偵知縣有勢要劫布商於鄱陽湖殺六客而貨其布於景德以告知縣知縣瑟縮不敢問履升以計擒其豪人服其膽智後以子

恂貴贈中憲大夫祀鄉賢祠

鄉賢畱祝冊

何恭錫字京左錢塘人康熙癸卯舉人興平知縣廉明報
最爲陝西治行之冠權養利知州所至有聲

錢塘縣志

祝翼權字瑞辰海寧人康熙癸丑進士晉江知縣耿精忠
初平民困未蘇軍府以勢相凌事多掣肘翼權不畏強禦
加意撫綏民賴之累遷工部員外郎母老乞歸

海邦耆舊志

陳潢字天一號省齋錢塘人少任俠負經濟才河道總督
靳輔招入幕問治河策潢爲言黃河水性源流因革及隄
防疏濬之宜任人審勢備料之法善守之方輔悉從其言
時楊家莊方決潢多開引河分水勢決口流緩遂塞之駱
馬湖淤漕運無由北達乃挑皂河二十里支河三十里由

張莊運口北上於是黃流無北灌之患清水潭在高郵北
運道所必由也隄防屢決潢親築長隄二道後稱爲永安
河異時漕船自淮出清口溯流一百八十里潢因修建遙
隄於宿遷以下取土築隄卽開運料小河旋規度黃河北
岸別疏一渠瀉北運河之水自攔馬河至仲家莊凡一百
八十里乃就運料小河浚而廣之使漕船渡河止二十里
許而中河運道通矣潢有定識不爲浮言所移好言水利
其天性也輔特疏薦之授河道旋卒

武林道
古錄

陳黃永海寧人康熙乙卯舉人安仁知縣時彫殘未復黃
永初至籍僅五十五丁市僅茅屋六十三間因編履阡陌

定上下仍寬其畝額以養民力民知有生擢給事中敷奏
皆關大計請南糧帶徵人尤德之

湖廣通志

何喬雲字令名錢塘人康熙丙辰進士授中書改桂東知
縣初至計民口止六百餘乃募流散給牛種具田器緩繇
賦流亡漸復闢學舍置書籍遂聞弦誦聲楚南多雜派喬
雲具文督撫上聞湖南州縣六十有三因請得免者四十
有三行取以主事用請假歸

桂東縣志

陳齊永字大年海寧人康熙丙辰進士臨邑知縣甫下車
值蝗災出庫鎡僱人力捕之浹旬捕蝗萬石歲大稔邑快
手蕭某殺人而嫁禍于鄰夢神告匣中人三字悟曰古之

國甲卽今快手必蕭某矣嚴鞠吐實一郡稱神

海寧縣舊志

陳勲字允升康熙丙辰進士知輝縣除積習設保甲均徭役葺學舍士風丕變考最歷綏德階州知州刑部郎中擢

監察御史

海寧州志

張曾禔字洵安海寧人康熙戊午舉人由嚴州教授遷知溧陽縣溧故產米區每易一令吏胥輒借較斛名科民間錢十萬餘爲贄曾禔未入境卽張諭禁革輿論德之解組

歸

溧陽縣志

蔣德昌字聿修海寧人康熙壬辰進士授中書改屯田主事兼督兩密值新建太和殿綜理精密歷刑部郎中讞獄

克允出爲湖廣提學僉事試牘不旁假恒夜分不寐以勞

卒諸生感之泣送數百里

海寧縣志

王典字備五仁和人康熙二十年由貢生任永興知縣縣經兵亂招流亡開荒蕪民以安集有虎爲暴禱城隍神虎自斃于市以饋餉功調杞縣政尚寬仁孺子彭某誤傷人典察其情出之建社倉興義學暇與諸生課藝多所成就

卒祀名宦

湖南通志

楊中楠字公三海寧人康熙甲子舉人授鹿邑知縣爲政不務煩苛年飢民有鬻妻子者惻然曰爲令不能謀保聚奚撫字爲乃捐俸貸之贖邑地勢窪下常患水中楠開渠

濬河闔境無淫滂之患卒于官

鹿邑縣志

吳燿字瀨濱仁和人康熙甲子舉人知山西榮縣邑遭水

旱民多逋亡燿下車卽請賑蠲賦逾年民皆復業旋丁內

艱起補河南商水縣以治河能奏調儀封病休卒于家

平陽府志

族弟煥錢塘籍康熙癸未進士知直隸慶雲縣邑小民

瘠勤于撫字修葺學宮士風丕振以最遷福建興化同知

去之日攀轅請留者數百人

河間府志

金星瑞字爾礪仁和人知樂亭縣隆禮學校修文廟崇祀

典水壞城垣設法修築不派累民間接物和平而執法必

謹彊暴斂跡陞雲南師宗州知州

永平府志

張曾裕字昆詒海寧人康熙戊辰進士授臨朐知縣濬木
刀溝以通水利邑西南山僻多盜嚴立保甲時單騎巡緝
至寒月尤厲年餘盜絕丁艱服闋補新樂縣縣故以社書
辦公事歲舉鄉之富而愚者當之多破析家產曾裕第擇
曉書算者親試以充民稱便有劉某惑于後妻訟子不孝
子懼而逃曾裕召其父諭以天性遂悔泣擢文選司主事

改御史卒于官

畿輔
通志

王廷獻字幼拔海寧人康熙辛未進士任鄆都知縣邑僻
處蜀東學者不知圭臬廷獻設書院講究經義邑士登第
自此始民多匿報墾荒里長搜歛之藉名充公實飽私橐

廷獻力稽弊竇輸將轉易合境稱便行取戶部主事歷刑

部郎中卒于官

海寧縣志

潘樹枏字孟扶仁和人康熙辛未進士知福清縣嚴明有風采行一條鞭法地丁屯折總歸一單不用差役滋擾改

下堂寺淫祠爲朱子書院後告養歸

福清縣志

高崧字南毓臨安人康熙甲戌進士知霑化縣下車甫四月有政聲丁內艱起復補通許縣當道知崧廉能連檄攝尉氏太康二縣篆以父憂去後補四川灌縣時用兵西藏灌縣爲松潘孔道軍需絡繹崧運籌得宜兵民帖服縣中久無科第崧至隆學校建義館加意培植至是始有領鄉

薦者行取禮部主事

四川通志

朱肇楨字觀濤海寧人嘉興籍康熙甲戌進士知陝西華

亭縣與民休息通渠鑿井以資力耕及再令真定使客絡

繹且供西北軍需肇楨事必躬親外和而內慎用民力常

留有餘亦克自免嘗議論者謂幹局本于識養焉

海邦耆舊志

高式青字則原錢塘人康熙丙子舉人除永寧令永寧故

山邑多旱曠其田仰溉十一渠大者曰萬廂曰宣利式青

深廣之令瀦洛水又開龍頭山舊渠名天一渠邑尤賴焉

鄰縣多私鹽奉檄治之以勞瘁得疾告歸去官之日百姓

感其恩德攀臥不絕于道且有泣送千里者

續河南通志

查克建字民用海寧人康熙丁丑進士授東鹿縣李光地
巡撫直隸稱其樸誠廉潔有古循吏風擢戶部主事邑民
感之爲立祠遷鳳翔知府未之任卒

海寧縣志

楊宮建字千門海寧人康熙中由貢生授城武令邑爲單
邑上流堤河久塞不治兩邑俱病宮建力請于大吏與單
邑同時修築瘠土遂成沃壤丁艱服闋補寶豐疏長渠備
水澇時稱楊公渠

山東通志

子存裕康熙乙酉副貢授長泰縣

以廉靜聞

海寧縣志

查嶠繼字武野海寧人康熙中吳逆構亂嶠繼杖策走湖
北謁蔡將軍召與語奇之薦授監利縣丞縣南臨大江營

壘相望師行釋騷嶠繼請每十里置亭堠俾得憩息朱河鎮有叛兵謀襲城嶠繼據險設伏擒巨魁餘黨宵散卒之

日民戴其德立祠祀之

湖北通志

楊守知字次也海寧人康熙庚辰進士祖侍郎雍正被命修高堰奏以守知代遂留河工除同知考最知平涼府地瘠而貧通賦數十萬其强者率相聚爲盜守知嚴設保甲定爲分年帶徵法良莠賴以安旣罷官總河薦其善治河復至邗上終中河通判

河南通志

周光斗字在霄海寧人康熙庚辰進士知豐城縣邑瀕江常苦水患築塘捍之民賴以安因稱周公塘

豐城縣志

林鴻選字渭符海寧人由貢生知南海縣省會幅廣事劇洋舶夷商之所湊詐競紛拏號難治鴻選堅明約束有訐者片言立決商民大和期年舶至倍前謂之不欺之市

廣東

通志

顧之珽字椿玉仁和人康熙己卯舉人知三原縣縣官日用例皆取給于民之珽至首申其禁刻石著爲令去之日一邑如失慈母泣送者數萬人擢行人敘城安西功晉一級仍管理三水縣事三水爲兩廣要衝商舶爭集探丸之盜出沒其間之珽跡知盜藪戮其首羣小遁去建議于邑之蘆包口設立將弁以廣邏警賊盜哀止調繁電白治行

如前尋罷官歸家

傳

王舟瑤字白虹餘杭人父家賓讀書孝友舟瑤弱冠登賢書屢困公車選江西興安令處廣信萬山中屢罹寇患城惟瓦礫草房八九間而已瑤至設法招撫未期年烟火千

家調補江南江浦縣卒于任

舊志

祝安國字濟叔海寧人康熙癸未進士知仁化縣縣有礦場役徒蜂聚亡命者匿其中安國策數騎入山約法四境以安皆訪獲盜魁諭之曰汝罪當死如能緝捕其餘吾將生汝囚感激效命盜風頓戢士未知學創義塾教之會病

卒

仁化縣志

盛宏遠字紫翰臨安人康熙癸未進士工書善詩少有西湖四才子之名知興化縣捐俸修葺學宮築修范文正公捍海舊堤海患永絕以疾告歸卒祀名宦

興化縣志

閔珮字玉蒼號雪巖錢塘人康熙丙戌進士授峨嵋知縣居官公廉不欺邑民萬某賈于外比歸盜殺其家八口不知主名珮親行履勘無他狀獨一室張新幃其女兄云此爲客寢某日吾父來家自言川西有客至珮憬然曰盜得矣縣逆旅故有記籍令吏收取披籍果得溫江客姓名卽移溫江逮治並獲其黨其明決多此類官至御史卒

家傳

邵錫光字克大仁和人康熙丙戌進士知新建縣下車卽

革陋規減耗羨又善決疑獄上官輒以旁縣事屬代讞清江縣何氏夫死族人誣氏毒其夫已成獄錫光奉檄覆檢傷在腎錫光曰此陰証也寃遂白貴溪楊胥妻爲無賴子所私賄捕誣以盜錫光發其奸遂服

江西通志服闋補江南類

上縣調繁溧陽武生宋武潛謀不軌以計擒之餘黨解散

陞雲南祿勸州知州卒于官

江南通志

葉亮字敬六仁和人康熙己丑進士知定陶縣初至縣小祿請賑格於例廼貸數百金爲倡置厰分給民德之定陶爲濟水所逕故渠漸淤爲疏鑿下流以大湖爲瀦後遂無泛濫之患善聽斷屢奉檄讞旁縣疑獄曹州民甲殺人而

誣乙獄具矣亮覆覈夢神示以鏡曰殺人者鏡中人亮曰
鏡中人卽對鏡人得非甲自殺乎鞠之立服設義學以課
士多所成就調雷化縣告歸

劉藻撰
墓誌

汪泰來字陞交錢塘人康熙壬辰進士潮州府同知瀕海
多盜奸販往往運米出洋泰來嚴行禁緝民始安堵管東
西兩界鹽場發帑不假手胥吏赴場督收餘鹽不令利歸
私販場課溢額革魚船規例禁踏勘供應以羨補前官虧
闕戊戌夏山水暴發決北門外隄創議捐築躬先畚鍤不
數月隄成民稱爲汪公隄

廣東
通志

王師旦字曰明海寧人康熙壬辰進士興寧知縣著廉聲

署香山篆見無票海舟踪跡頗異縛訊具服盜贓猶在也
閱故牘有嫗控番殺其子獄成而尸未獲呼嫗曰爾子不
死爾好言匿何所當宥爾不然反坐嫗頓首服罪累遷江
南通州以供簿失使者意墨計典歸

海寧縣志

陳武嬰字聞野海寧人康熙乙未進士雒南知縣清理丁
賦以墨誤去起補莆田知縣故牘壅積悉爲裁決寘作奸
者於法復罷去再補崇安歲祲米驟貴懲治其劫奪者設
廠賑濟民以安集

傅王露撰墓誌

沈繼賢海寧人康熙乙未進士樂亭知縣北方開管田繼
賢相視沙土易淤不便水耕告上官勿垂土性之宜永平

府屬惟樂亭無改疆畝民咸德之越五年以緩征落職民爭先輸納限內還故官補山西嵐縣土瘠民貧遇採贏馬市鞍屎向以軍需故半其直繼賢全給之調太原編審田畝釐正丁課吏不能欺尋乞歸

海邦耆舊志

許惟枚字鐵山海寧人康熙丁酉舉人儀徵知縣錄囚見淹繫六十餘人皆掃積零鹽兵役誣以私販者盡釋之清丈蘆洲京口將軍占洲爲牧地屬免丈勿聽曰法之行自將軍始其剛正類此歷知崇明上元縣俱有惠政

海寧舊志

陸鶴字西溟海寧人康熙丁酉舉人連江知縣瀕海民以捕魚爲生貧輒入海爲盜鶴語漁人曰爾爲漁失利孰與

爲盜殺身後有以貧輟業者許官借貲本皆叩頭泣謝盜
遂衰息諸羅奸民捕旂猖獗鶴調任三月獲首從百餘人

秩滿移詔安縣遷澎湖通判卒於官

海寧舊志

金虞字長孺錢塘人少以文學著聲康熙庚子舉人以保
舉署黃梅縣有洪貞女繼嗣未定族人爭其貲貞女義不
赴質虞造門請見卽日定其事改署石首洪水決堤虞誓
以身禦督修三晝夜堤遂成授孝感知縣剔侵隱清盜原
遇疑獄一勘卽得麻城有婦逃匿誣繫多人掘及枯墳刑
及問官旣成讞卒廉得其實者虞之力也以憂去起補山
西蒲縣洪洞謀鑿山奪蒲縣喬家川水源虞力言於臺使

得如故卒於官貧無殮

夏力恕撰傳

程餘慶字敬直錢塘人少從沈近思遊得其指授康熙庚子舉人署蓬溪縣授洪雅知縣丁母憂服闋補銅梁知縣縣有子忤父者法當死其父以年衰獨子爲請餘慶反覆譬喻釋之子卒改爲善調知昭化縣旁縣彭某以殺人抵罪秋讞稱冤巡撫令餘慶廉治之冤遂白縣道多險阻捐俸鑿山數丈遂成坦途丁外艱歸遂不出行

陳堯賢號藥町仁和人康熙中知潯州捐貲葺學宮建忠

義祠歲祿糴穀二千石以賑饑全活無算築城垣繕橋梁

善政畢舉州人作詩記其事

潯州政績錄

史鑑字平東仁和人康熙中由貢生授柘城知縣開溝洫興水利卑窪悉成膏壤設立義學百有餘所延師訓課文教振興擢行人司行人卒祀名宦祠

河南通志

祝翼曾字廸前海寧人康熙中由貢生授知清苑縣邑多溪塘民不知水利翼曾教民製水車耳運以禦旱兼營水田藝稻農業漸饒子壽名康熙辛丑進士歷涼州同知檄辦西藏軍需以幹濟聞卒于官初知莊浪縣有惠政遂葬于邑之大仙村每遇誕日拜祭不絕

海邦耆舊志

汪天柄錢塘人康熙中由貢生知西寧縣邑有土可煎鹽官慮引鹽不售抑不許煎商人更作威福爲民病且三十

年天柄設法詳請公私便之崇祀名宦

徽輔
通志

王喬林字文河號退思錢塘人雍正癸卯進士授翰林院庶吉士改主事出知江南金匱縣縣屬水鄉舊多盜賊喬林廉得其首名設法捕治羣盜斂跡邑民素昧蠶桑出資市桑秧分植城四隅僱吳興老婦教之飼法又刻蠶桑輯要一書徧給之累擢知山西平陽府尋署鎮江時江南大旱鎮屬尤甚喬林請上司普救不許乃親赴揚郡乞種子大鹽得穀萬石開厰平糶并勸富民捐輸以濟民食

文阿
年譜

戴永椿號卯君錢塘人家于歸安雍正癸卯進士授編修改御史出爲山西按察使調江蘇左遷潯州守持憲七年

折獄治繁有廉平績

湖州府志

胡兢字又乾號質孚仁和人雍正甲辰進士初任四川長寧縣長邑小民疲值烏蒙用兵羽檄交馳軍需緊急兢至時芻茭備糧糧殫神恒廢寢食尋改知陝西狄道縣民有爭水田積案數十年不決兢下車立爲白其寃又有儒生爲盜所誣兢廉得其實立釋之性耿介不肯伺意旨與知府不協遂被劾大吏素器重兢聘主皋蘭講席一時多所成就以親老歸

家傳

朱榮字魏成海寧人雍正甲辰進士授順天永清知縣下車首革淀河水圍無名供億旗園地畝永清獨多交地丈

地旗員絡繹租額屢加逋負日積槩槩從寬減歲額以清
永定河春夏水發往往潰堤決口浸沒田廬槩親督堵禦
且捐俸賑被水窮黎不致失所在任五年以病乞歸

海那
者舊

志

吳正一字訥言錢塘人雍正癸卯舉人授天河知縣縣係
苗疆時蠻酋木東倡亂橫據水路正一假土人艘深入擊
之賊遁旋伏兵間道獲其首械送申釋餘黨民賴以安邑
鄰黔黔苗叛粵帥進勦檄正一輸運無違悞凱旋錄功時
東蘭新建州遂陞知州地苦烟瘴正一至設法開河以洩
地脈瘴稍減所規畫悉如內地竟以勞卒于任州人思其

德爲立祠乾隆二十一年兩廣總督具題奉

旨廕其一子

商盤撰吳正一祠碑記

郭懋嶸字汝崢海寧人雍正癸卯舉人歷知秦安渭源碾伯平番諸縣皆西陲要區畫兵屯及居民耕牧無失時失事遇調遣勇敢先人上官倚賴之擢知河州總兵駐劄地也承流協贊卒伍帖然以勞瘁卒于官

海寧縣志

應際盛仁和人雍正癸卯舉人知甘肅西寧縣治崇簡易洗滌煩苛時值大軍凱旋之後民力未舒力請于臺使者減賦輕徭又捐俸儲粟以濟民食全活甚衆撫字三年邊

邑以甦

西寧縣志

許勉燉字思晦海寧人雍正丙午舉人知魯山縣會有老
瓜之獄積數十案不結勉燉建議以此曹自知必死故蔓
引以緩其誅不若左證既明卽事斷結爲便一時囹圄以
空再起知汜水縣邑濱河洛春夏水盛嚙城殘堞累卵民
倉皇徙避瀕爲魚者數矣乃建築內外二壩亘以長堤汜
人德之號許公堤

汜水縣志

嚴在昌字季傳仁和人事後母以孝聞雍正庚戌進士授
知江西萬載縣操守清介視民如子考最擢貴州永寧知
州有政聲甫一載告歸州民泣送數十里不絕

行狀

馮大山字嶽維海寧人雍正庚戌進士試用江蘇賑高郵

饑實惠及民授宜城知縣宣城故東南文藪凡以文事請謁者皆禮遇不倦或干以私輒正色拒之尋以里誤去起

知婺源縣遭疾卒祀名宦祠

婺源縣志

龔鑑字明水號碩果錢塘人雍正中由選貢生授甘泉令甘泉新邑諸事草創非俊健者罔克勝任鑑子惠黎元振興文教絕苞苴嚴請托抑豪橫禁奢麗以此之謂民之父母七字榜于治事堂而人莫敢干以私旋以父憂去官貧

不能謀朝夕

道古堂集

張嘉論字隆雲海寧人雍正中知沛縣邑瀕湖地二千餘頃歲有被淹例于冬月納漕後勘明災畝分別蠲徵嘉論

請以上冬預勘先定次年賦額胥吏不得增減民稱便焉
調常熟縣邑南大義橋樞關者設柵以稽稅爲名故滯民
船悉其搜索嘉論力爭得撤去終江寧知縣

海邦耆舊志

汪浚字德遠錢塘人以貢生選浦江訓導地樸少文學學
舍頽圯浚鳩工庀材復舊制集諸生課業或篝火不給捐
俸助之擢泰恆教諭以薦當得知縣親老告歸

行狀

姚遠翹字羽豐錢塘人雍正己酉副榜武義縣教諭善於
訓迪舉卓異擢米脂知縣俗多溺女遠翹反覆勸喻兼設
十家相糾之法俗頓革縣境接鄂多斯部落故事預給籽
種後多逋負遠翹酌歲豐歉令分年遞徵遂完積負調華

陰知縣縣東鄉三河口爲河渭洛所交漚庚午秋溢西鄉山水復暴漲遠翻方在臺站儲峙西師芻茭歎曰不能以供億誤民事馳赴賑恤全活以萬計繕城垣建雲臺書院縣人勒石頌焉後補淮安分司海口舊有五圖河爲南北六塘河出海尾閘淤久矣創議濬復身厠畚鍤開通四十里復疏北運鹽河民便之擢刑部郎中告養歸

金銓
撰傳

任應烈字武承錢塘人雍正庚戌進士授編修終南陽知府應烈少以文學著聲所至好興文教書院諸生倍給其膏火唐韓文公後裔在河南許其世襲五經博士由應烈所申請也折獄詳審修復水利爲久遠計及以病告歸南

陽人踰數百里送之

家狀

周助瀾字通川仁和人雍正乙卯舉人爲餘姚教諭喜汲引寒士清介自守遷四川筠連知縣筠連倚山爲城士不知學助瀾置學田擇士之秀良者親課之俗患啜匪力治之不少貸閭里安輯戶口日增尋以疾乞歸

行狀

蔣作楫字巖升仁和人雍正乙卯舉人慈谿教諭歲饑捐俸糴米以濟貧者遷仁壽知縣有以金三百投車中者捕治之則以兄子被誣求昭雪也鞠之得寃狀雪其人而還其金縣人久而思之

王際華撰墓志

王度字伊臣錢塘人雍正中以保舉授延川知縣調清澗

縣舉卓異歷雷州同知叙永同知有侯登科爲盜所殺牽連被誣者七人臨決呼冤度鞠之得實力請於上官俱獲免捐俸鑿平江門巨灘開擦耳崖險道水陸往來俱無患終池州知府

家傳

諸克任字伊人仁和人乾隆丙辰舉人讀書務求實用知識過人選建德教諭山東巡撫奏請入幕巡撫移治雲南留雲南者五年歸里補嘉善教諭長於訓迪應銓知縣嘉善人挽留之克任亦澹於仕進不赴晚還寧波府教授扶植士類如嘉善士論歸之

高瀛洲撰傳

潘世仁字廷獻仁和人乾隆戊午舉人太湖知縣署無爲

州州瀕於江多水患世仁祭江神用童子五人分著五色衣取五土之義具牲醪虔禱越三日江岸土埂悉爲水刷去田廬安堵調阜陽縣創修縣志縣城外皆平原無崇山爲障潁水沙水來自西北汝水淮水流自西南而西淝水直注於北時有泛濫世仁謂水潦之患不在淮黃爭流在江湖溝港之湮塞愚民占淤地爲田則通流無所蓄暴漲無所容廼復故道浚深源引水交匯設堰埭築陂塘以資渟蓄謹其啓閉又定歲修之法每鄉置甲長分董其役阜陽遂無水患它善政舉類此

狀行

胡際泰字寅若仁和人號子家學相承踐履篤實乾隆丁

已進士歷知呈貢新平二縣擢昭通府通判雲南民苗雜處以惠愛撫綏人皆感德昭通饒金礦復產碧霞諸珍異一無所取比歸囊囊蕭然主講浦陽書院多所成就

公舉事實

沈廷標字名世號廣堂錢塘人乾隆己未進士癸亥補禾郡敎授嘗捐貲修學宮來學者歲嘗數十人講誦日夕不輟庚午擢萍鄉知縣調繁清江廷標持身廉潔以振勵風俗爲已任勤于判牘剖決如流所至稱神君凡所興築咸協輿情尋以病告歸

道古堂集

子景煦字和叔自成童無他嗜

好多購古書丹鉛不去手鈔撮精要部居薈粹著錄滿架詩文輿衍而刻露多未經人道人稱循吏有後云

行畧

許州字允元海寧人乾隆己未進士授蒲圻知縣匝月獄
決疑獄七十餘案一縣以爲神性剛介不畏強禦嘗識一
冤獄武昌知府張肯堂欲枉之炯具牘力爭且言風聞有
行賂者恐爲清名累肯堂悲甚陽感而陰構之竟以細故
免蒲圻至今稱其廉云

海寧
州志

仇然字聖雨錢塘人乾隆壬戌進士授河南上蔡縣蔡地
窪下春夏之交汝西新偃遂項諸邑水交注于蔡民皆遷
徙失業歲十無一登然甫下車卽毅然自任曰此吾責也
三年政聲通遐邇大吏擬銓補他邑力辭惟竭日夜力相
度原隰察水所從來并歸宿處議築柳堰堤一千四百二

十丈樹河堤一千四百丈開茅河自十字河口起至崔王
家庄長四千二百丈泥河自月灣起至汝陽界長九千餘
丈築白水乾漢閘二座二十三年巡撫胡寶琮請于

朝秋七月開工然籌畫尺寸廣狹及工費出入諸務精核詳察
心力俱瘁閱九月事竣遂得疾甫七日卒蔡人食其利至

今祀之

墓誌

許葵字敦兮錢塘人乾隆乙丑進士選庶吉士出知滎陽
縣調鹿邑開水利清積逋奸民習爲順刀會悉置之法風
遂戢舉卓異擢知許州檄調河北犒軍置頓整暇部伍帖

然

海寧
州志

趙賢字端人錢塘人乾隆戊辰進士瀏陽知縣民買田宅
書契需官印鈐尾稅多隱漏或持其事爲居奇之地列戶
名田數以上且陷賢以厚利賢第限一月投稅民遂爭先
輸納縣有古風洞舊爲盜藪巡撫命賢察之賢白其虛并
言境內諸洞久皆杜塞民以安堵適布政司以稅弊事聞
巡撫稱爲第一良吏會征漕力除積弊糧儲道不復入境
曰是固無待訪察也舉卓異調永順以勞瘁死臨歿知府
親視含殮告其屬曰吾爲國家惜一良吏非私同官也過
瀏陽哭送者殷道路

墓誌

許惟權字行中海寧人由副貢授松陽教諭擢聞喜知縣

邑多逃亡絕戶力請于上官豁免七十有奇累遷知商州

捐貲修商於書院增其膏火士風丕振尋致仕歸

海寧州志

鄭之翀號半桐錢塘人乾隆丁丑進士賀縣知縣性寬厚折獄不輕事鞭扑詳審導問務得民情廣西山田蠲納賦多不登之翀加意撫字賀縣課爲他縣最好文學縣人多師事焉去官後久而見思

賀縣志稿

湯萼棠字韓齋仁和人乾隆癸未進士刑部主事累遷郎中出知江西南安府梅嶺爲江廣通衢曩時檐夫鼠竊詰之則互相譏萼棠飭行戶設保夫責償所失移文廣東南雄府並著爲令行旅便之調撫州府屬縣有坐坊捕役藉

緝盜名隱爲屏寄痛懲之弊乃革護理吉南贛寧道贛俗
多溺女爲曉諭禁止復調南昌府驅娼妓懲惡少尤嚴夜
行之禁置柵衛巷捐給綿衣俾守者禦寒無懈盜賊衰息
四民樂業焉

行狀

雷汪度字饒九錢塘人乾隆庚辰舉人寶豐知縣浚德化
普濟新慶諸渠資灌溉疏泄潦水達於汝州宋公渠而水
患息調虞城縣潁河有土埧三橫亘下流以禦河水之建
旣直下者值暴漲則自上游之儀封考城商邱以至縣境
胥被患汪度議殺埧尾督率工竣數縣賴焉擢知陝州州
屬閭鄉與潼關隣閭鄉西董村民向飲渠水其水發源於

潼關之大畱屯而大畱民慮水易竭預遏其流訟久不決
汪度謂水有餘則可相濟廼以漢井諸村水給大畱訟遂
息陞汾州知府城西北有馬跑泉故時疏引入城以資民
汲久之堰壞水不至汪度按故道修治而民不苦遠汲因
名曰通翼渠後以足疾告歸

盧文弨
撰墓表

張開士字軼倫錢塘人乾隆壬戌進士知銅陵縣歲稔請
賑不獲見巡撫而泣求罷去巡撫改容聽之有儒童爲盜
所誣力剖其冤移知宿州黃水屢決開士多方賑恤全活
無算擢知常德府未任以憂歸不復起

袁枚
撰傳

杭州府志卷八十九終

杭州府志卷九十

人物五 儒林

晉

范平字子安錢唐人研覽墳素徧該百氏姚信賀邵之徒
皆從受業吳時舉茂才歷臨海太守有異政孫皓初謝病
還家敦悅儒學太康中頻徵不起卒諡文貞賁循勒碑紀
其德行三子爽咸泉並以文學知名泉子蔚爵關內侯家
世好學有書七千餘卷遠近來讀者恒百餘人蔚子文才

亦幼知名

晉書
本傳

南北朝

顧歡字景怡鹽官人家貧父使驅田中雀歡作黃雀賦而歸雀食過半父怒欲撻之見賦乃止鄉中有學舍歡壁後倚聽無遺忘者及長篤志好學母老躬耕讀書夜則燃糠自照同郡顧顗之見而異之遣諸子與遊及孫憲之並受經句年二十餘更從豫章雷次宗諮元儒諸義母亡水漿不入口廬于墓遂隱剡天台山開館聚徒受業者常近百人太祖輔政徵爲揚州主簿及踐阼乃至稱山谷臣顧歡上表獻治綱一卷詔付選銓歡旋東歸上賜麈尾素琴永明元年徵爲太學博士不就歡口不辯善于著筆注王弼

易二繫學者傳之

南齊書本傳

呂道惠餘杭人學徒嘗有百數錢塘范述曾從受五經獨稱述曾曰此子必爲王者師

梁書范述曾傳

盛紹遠餘杭人梁封關內侯天監二年聚徒數百人以授業歿後門人相與立碑以旌德業

咸淳志

戚袞字公文鹽官人少聰慧游學京師受三禮于國子助教劉文紹一二年中大義畧備年十九梁武帝勅策孔子正言并周禮禮記義袞對高第除祭酒從事史就國子博士宋懷方質儀禮義懷方北人自魏攜儀禮禮記疏秘惜不傳及將亡謂家人曰戚生若赴便以儀禮禮記義本付之若其不來隨屍而殯爲儒者推許如此梁簡文在東宮

令中庶子徐摛馳騁大義間以劇談摛詞辨縱橫難以答
抗諸人懾氣皆失次序哀時騁義摛與往復領答如流簡
文深加歎賞遷員外散騎常侍敬帝承制出爲江州長史

撰禮記義四十卷行于世

陳書
本傳

褚仲都字子京伯玉次子錢塘人精周易之學梁時爲五
經博士娶諸葛氏生一子修卒年六十一塋龍山

褚氏
家譜

全緩字宏立錢塘人幼受易于博士褚仲都篤志研覈得
其精微梁太清初歷王國侍郎奉朝請俄轉國子助教兼
司義郎專講詩易紹泰元年除尚書水部郎太建中累遷
南始興王府諮議叅軍隨府詣湘州以疾卒緩治周易老

莊時人言元者咸推之

陳書本傳

顧越字思南吳郡鹽官人所居新坡黃岡世有鄉校由是顧氏多儒學焉越少孤以勤苦自立聰慧有口辨說毛氏詩旁通異議梁太子詹事周捨甚賞之解褐揚州議曹史兼太子左率丞越于義理精明尤善持論與會稽賀文發俱爲梁南平王偉所重引爲賓客尋補五經博士遷國子博士世祖卽位除始興王諮議參軍侍東宮讀世祖以越篤老厚遇之除給事黃門侍郎又領國子博士侍讀如故廢帝嗣立除通直散騎常侍中書舍人華皎之構逆也越在東陽或譖之于高宗言其有異志詔下獄因坐免太建

元年卒于家

陳書本傳

著喪服毛詩老子孝經論語等義疏四

十餘卷

南史本傳

杜之偉字子大錢唐人家世儒學以三禮專門之偉幼精敏有逸才七歲受尚書稍習詩禮畧通其學十五遍觀文史及儀禮故事時輩稱其早成中大同元年梁武帝幸同泰寺召之偉草具其儀補東宮學士與學士劉陟等鈔撰羣書各爲題目所撰富教政道二篇皆之偉爲序尋除揚州議曹從事南康嗣王墨曹叅軍兼太學限內博士七年梁皇太子釋奠于國學時樂府無孔子顏子登歌詞尚書叅議令之偉製其文伶人傳習以爲故事轉補安前邵陵王

田曹叅軍又轉刑獄叅軍之偉年位甚卑特以彊識俊才
頗有名當世侯景反逃竄山澤及高祖爲丞相素聞其名
召補記室叅軍遷中書侍郎領大著作高祖受禪除鴻臚
卿尋轉大匠卿遷大中大夫仍勅撰梁史永定三年卒高
祖甚悼惜之詔贈通直散騎常侍賻錢五萬布五十疋棺
一具尅日舉哀之偉爲文不尚浮華而溫雅博瞻所製多
遺失存者十七卷

陳書
本傳

顧彪字仲文餘杭人明尚書春秋煬帝大業時爲秘書學
士撰古文尚書疏二十卷行於世

北史
本傳

魯世達餘杭人煬帝大業時爲國子助教撰毛詩章句義

疏四十一卷行于世

北史本傳

唐

褚無量字宏度鹽官人刻意墳典擢明經第累除國子博士遷司業兼修文館學士中宗將南郊詔定儀典時祝欽明建言皇后爲亞獻無量固爭以爲周禮后不得與元宗卽位遷左散騎常侍兼國子祭酒封舒國公母喪廬墓鹿犯所植松柏無量號訴曰山林不乏忍犯吾塋樹耶由是羣鹿馴擾不復棖觸喪除以耆老隨仗設腰鞶許乘入殿中內府舊書甲乙叢倒無量請繕錄補第以廣秘籍不數年四庫完治帝詔羣臣觀書賜無量等帛有差未幾徙書

麗正殿復詔無量就殿纂續前功太子諸王未就學無量以孝經論語五通獻帝乃選和常亨等爲侍讀太子齒出於學詔無量升坐講勸百官觀禮厚資賜卒年七十五詔贈禮部尚書謚曰文沒後有于書殿後得講史記至言十二篇上之帝歎息以絹五百疋賜其家

唐書本傳

宋

盧正字叔微杭州人自幼穎悟及長曉五經大義酷嗜周易孟子端拱初登進士第調補真定東鹿主簿未及赴官卒年二十七嘗著五帝皇極志孺子問翼善書數十篇

萬歷

舊志

陸滋字元象世家于杭通毛鄭二詩易春秋試于鄉一舉而售母病不行後三年復在選察母有難色亦不忍行陳堯佐使兩浙與滋書強之行謝不往博極羣書以答客問必章解句析不差一字問者輒服謂終年讀書不如與陸先生一日語皇祐四年詔錄先朝遺士郡以滋應詔得杭州文學嘉祐六年卒滋好古篤信里俗襲吳越僞禮多僭忒滋爲援典制家矯而戶正之敝俗頓革所著詩賦

文論合二十卷

兩浙名賢錄

謝景平字師宰富陽人登皇祐五年進士第終秘書丞好學善著書所撰詩書傳說數十篇

舊富陽縣志

葉昌齡錢塘人慶歷六年賈黯榜登第歷官職方員外郎有周易圖二卷以正劉牧鈎隱圖之失凡四十五門

錢塘志補

吳天秩字平甫錢塘人幼聰穎勤苦該洽杜門著書粹茹自適者幾二十年薦補太廟齋郎大庾尉俱辭不赴再調

浮梁尉到官逾年沒有文集五十卷

舊仁和县志

郭知運字次張鹽官人刻意墳典弱冠登進士第時相秦檜強姻不就歷官荆門守雅尚清節不慕榮祿不妄交與嘗與張九成極論和議之非以倦遊乞歸卜居雙廟自號息菴老人著有猥園稿四十卷

咸淳志

吳師禮字安中錢塘人太學上舍賜第知天長縣召太學

博士秘書省正字徽宗初擢右司諫改右司員外郎工翰
墨帝嘗訪以字學對曰陛下御極之初當志其大者臣不
敢以末伎進聞者獎其得體以直秘閣知宿州卒初師禮
遊太學時兄師仁爲正守春秋學他學官有惡之者條其
疑問諸生師禮悉以兄說對學官鳴鼓坐堂上衆質之師
禮引据三傳意氣自如江公望時在旁心竊喜後遂定交
師仁字坦求篤學厲志不事科舉喪親廬墓日倩旁寺僧
造飯一鉢以充饑不復蓄僮僕郡守陳襄鄧潤甫皆以遺
逸薦于朝元祐初召爲太學正遷博士後爲潁川吳王宮

教授卒

宋史
本傳

崔貢字廷碩仁和人端重有識內行淳備大觀中詔舉入
行郡邑以貢應授密州文學卒鄉人尊之曰八行先生後
仁和學建三賢祠貢與褚文公許荊州並祀焉

舊浙江通志

張九成字子韶其先開封人徙居錢塘游京師從楊時學
權貴託人致幣曰肯從吾遊當薦之館閣九成笑曰王良
尚羞與嬖奚乘吾可爲貴游客耶紹興二年策進士九成
對曰禍亂之作天所以閔聖人也願陛下以剛大爲心無
以憂驚自沮前世中興之主大抵以剛德爲尚去護節慾
遠佞防姦皆中興之本也今閭巷之人皆知有父兄妻子
之樂陛下可不思所以還二聖之車乎又言闕寺聞名國

之不祥今此曹名字稍稍有聞臣之所憂也擢寘首選授鎮東軍簽判吏不能欺民冒濫禁提刑張宗臣欲逮捕數十人九成爭之宗臣曰此事左相封來九成曰主上屢下恤刑之詔公不體聖意而觀望宰相耶宗臣怒九成卽投檄歸從學者曰衆趙鼎薦之于朝遷著作郎除浙東提刑力辭乃與祠歸未幾召除宗正少卿權禮部侍郎兼侍講兼權刑部侍郎金人議和九成謂趙鼎曰金實厭兵而張虛聲以撼中國因言十事彼誠能從吾所言則與之和使權在朝廷鼎旣罷秦檜誘之曰且成檜此事九成曰九成胡爲異議特不可輕易以苟安耳檜曰立朝須優游委曲

九成曰未有枉已而能直人上問以和議九成曰敵情多詐不可不察因在經筵言西漢災異事檜甚惡之謫守邵州中丞何鑄言其矯僞欺俗傾附趙鼎落職丁父憂旣免喪秦檜取旨上曰自古朋黨畏人主知之此人獨無所畏可與宮觀先是徑山僧宗杲善談禪理九成時往來其間檜令司諫詹大方論其與宗杲謗訕朝政謫居南安軍十四年每執書就明倚立庭磚歲久雙趺隱然廣帥致羸金九成悉歸之檜死起知温州戶部遣吏督軍糧民苦之九成移書痛陳其弊戶部持之九成卽丐祠歸數月病卒寶慶初特贈太師封崇國公謚文忠

宋史本傳

學者稱無垢先生

所著有尚書中庸大學孝經語孟說無垢錄行于世

萬歷錢塘

縣志

李元綱字國紀錢塘人號百鍊真隱乾道間寄居吳興之新市力學好古雖困窮撻履益堅怡然自得不爲外物異端之所搖奪撰聖賢事業圖集說三先生西銘解厚德錄

言行編諸書

兩浙名賢錄

關注錢塘人其祖魯以進士起家盡力于官歷守池台二州爲尚書郎八子皆學行修立以進士舉者六人景仁尤

著注景仁子也

萬歷錢塘縣志

字子東

夢梁錄

登紹興五年進士第

嘗教授湖州與胡瑗之孫滌哀瑗遺書得易解中庸義藏

之學宮意在子美風俗新人才官至大學博士卒自號香

巖居士有關博士集二十卷

咸淳志

施德操字彥執鹽官人學有本末主孟子而拒楊墨曰絕人倫漫等級棄禮樂仁義不用飾荒幻報應誑愚取資尤爲世蠹因著論以曉未悟學者稱持正先生同里楊璿字子平鹽官人安貧樂道不妄取與尤嚴謹獨之操居暗室猶在康衢學者稱謹獨先生與施德操皆力行好修里人嚮慕邑令魏伯恂闢祠合張九成與二人祀之于學

錄

兩浙名賢

沈清臣字正卿海寧人嘗爲國子學錄有薦爲館職者執

政不許宰相惡沈介乃以清臣奔競下大理風使引介不從謫封州晚乃召用勸孝宗力行三年喪爲嘉邸翊善以直諒稱從張九成學所著有晦巖集十二卷

舊海寧縣志

葉時仁和人操履端凝累官至龍圖閣學士卒謚文康著

有禮經會元竹野集

嘉靖浙江通志

字秀發博學善屬文尤邃于

周禮爲學者所宗晚居嘉興

兩浙名賢錄

郎晁字晦之海寧人學于張九成以儒學知名或謂其世

系與侍郎郎簡同譜郎曰我家世白屋豈可妄攀華胄識

者許之

咸淳志

按萬歷錢塘縣志載儒林傳並列名選舉特奏名科今

從咸淳志作海寧人

趙善湘字清臣濮安懿王五世孫聞明州多名儒徙居焉
慶元二年舉進士以平寇功十七年封祥符縣男紹定三
年進煥章閣直學士封伯爵李全犯淮東乃命專討進封
侯加食邑及戮全進兵部尚書五年進資政殿學士九疏
勾歸皆不許封天水郡公淳祐二年帝手詔求所解春秋
進觀文殿學士致仕卒贈少師

宋史本傳

章樵字升道號峒麓昌化人登嘉定元年進士第歷海州
高郵山陽教官尋知漣海軍一再上時相書力陳李全必
叛劉瑄不可任重後全作亂郡縣官多被禍獨樵率諸生

盛服坐堂上講誦賊至歛刃而退擢宰吳縣通判常州皆以廉著御史洪咨夔舉其有守擢監登聞鼓院尋以疾勾歸授朝散郎知處州事卒樵學宗伊洛議論通暢識達時務所著有集曾子十八篇章氏家訓七卷補註春秋繁露十八卷古文苑二十卷行世

成化舊志

章樞昌化人開禧元年進士官玉山主簿以讀書明道爲已任家創義塾延名師四方負笈日衆後多有爲通儒爲名臣者及卒贈通議大夫丞相吳潛撰文祭之學者稱爲

南塾先生

昌化縣志

按舊志載錢象先不詳其籍貫仁和志列入儒林傳作

仁和人省志槩言杭人及攷宋史爲蘇州人今以宋史爲据削而不錄

元

董鎮其先河南人曾祖官臨安遂家潑浦父仲溫尚朱室主爲駙馬鎮聞金華許謙爲朱子之學裏糧往從謙深器之謙卒鎮築室仙華山三年而後歸仙華山謙講學處也歸作嘉會堂于靈泉右畫朱子像左書儒行篇從遊者日衆洪武丁未卒劉基題其墓曰董處侯

浙江通志字仲貞通經術有用世志值元亂隱居海寧之泉山

海鹽文獻志

明

袁時億字益善新城人五六歲能誦孝經論語洪武初以明經薦授吳江教諭孜孜講說聖賢道德仁義以開諭後學爲已任屢典文衡號稱得人承詔修永樂大典事竣乞

休卒于京師

新城縣志

周倫字敘昌右衛人穎敏博洽正統鄉舉歷嘉定容城訓導終永寧教諭所至講讀不倦教人曲盡恩義事上以禮恥隨時容悅與人言剖析是非未嘗枉已以干權勢廣文三十年意豁如也喜起人急難排斥異端有剛方之節貪懦者聞風憚之

萬歷錢塘縣志

夏資富陽人成化庚子鄉薦博學能詩文湛于經術爲後

進師表甲辰授河南息縣教諭因先儒成法隨身造就士
競遵之修息縣志後人奉爲模楷尋調湖廣麻城教諭賚
家世春秋箋疏傳註畧皆通究悉爲諸生講貫大義麻城
春秋爲天下所推自此始特祠祀之

富陽縣志

邵銳字思抑仁和人正德三年進士時劉宇用事欲私其
子仁爲翰林而難于獨授以銳與黃芳名在仁前銳又舉
會試第一欲藉以塞清議乃言于劉瑾取中旨並三甲前
列者李志學韓守愚五人俱授爲庶吉士銳雅負志節恥
不欲就兄欽勸之銳乃就職踰年授編修瑾誅除仁名謫
諸傳奉者于外並及銳八年補寧國推官銳念向者執之

不堅慮爲終身玷乃刻意奮勵以嚴苦自持遇獄訟不得其情不止屬縣有大姓誣人以盜縣已納其賄煅鍊成獄銳疑焉立往按出之斥罷其知縣居三年名大起遷南京吏部主事調禮部員外郎引疾歸用薦擢江西僉事進福建副使俱董學政令諸生誦習白鹿洞學規凡守身處事立言悉奉以爲則非是者卽嚴于罰念建文廟忠臣湮沒命分宜祠祀黃子澄漳州祠祀陳思賢伍性原陳應宗林珏鄒君默曹廷瑞呂賢其他先賢祠墓悉爲修復嘉靖初遷湖廣參政歷河南按察使廣東山東左右布政使皆有惠澤比去民涕泗追送十一年入爲太僕卿尋得疾告歸

以門蔭昇兄子卒之日橐無餘金田不及百畝詔贈右副都御史以篤學有行特謚康僖銳生平耻近名學以程朱爲鵠所與切劘道義者同邑胡世寧崑山魏校永豐夏尚朴而已先與桂萼友善及萼爲相貽銳書不答

武林耆舊集

孫景時字成叔杭之右衛人性耿介于世寡諧師事王守仁湛若水與山陰汪應軫仁和邵銳江暉錢塘吳鼎爲友正德丙子舉于鄉筮仕長洲教諭遷攸縣令却餽例雪平民枉狀逮豪右易滔發其奸贓論如法人多稱之無何解官歸乃蒐輯故典證以長老舊聞質諸鄉評作武林文獻錄

舊仁和縣志

俞膺字古章富陽人讀書不求聞達蕭山魏驥雅敬愛之

布政使寧良問政陳救荒十策多見施行正統景泰間大

吏先後薦舉皆不赴修富陽縣志歿後崇祀鄉賢

富陽縣志

陳善字思敬錢塘人父荆獻博洽端方從王守仁游以貢

司訓崑山善幼穎異從父游守仁門守仁以任道器許之

弱冠舉進士三令巖邑擢郎官督學滇粵梓經史覈課程

崇行誼士蒸蒸向風所至俎豆之仕至左布政使疏止採

金貢象諸大役無片刺通政府當大計纔上規勸數十言

而已時多其抗直未六十告歸講明理學郡中推爲主教

賦性端樸步中規矩危坐終日無疾言遽色家範整肅庭

屏悉題古人言行遵行古禮尤好施濟寡人待以舉火者甚衆收掩道殣修治東新餘杭諸塘慈雲黃泥諸嶺壬午民亂相戒弗犯其見重于時如此子植槐國子監生端介有父風孝友尚義父歿二十年私居不釋衰絰竟以遷葬哀毀卒所著有自警新篇

萬歷錢塘縣志

董澐字子壽海寧人年六十八游會稽肩瓢笠詩卷謁王

守仁卒請爲弟子子穀官知縣亦受業守仁

明史鄭守益傳

澐字

子濤別號蘿石徙居澈浦少慷慨慕義嘗割私產讓兄還友人所質田且經紀其喪以能詩名江湖間晚間陽明講學試往聽之歎曰吾非至夫子之門虛此生矣遂因何泰

而北面焉人或非之濬曰吾自從吾所好耳因號從吾道人
濬雖晚聞道然所得甚粹嘉靖甲午卒年七十七穀字
碩甫正德丙子舉人令安義調漢陽廉靜不苟坐忤大吏
歸好學工詩文

海寧縣志

按省志濬海鹽人今從明史儒林鄒守益傳定作海寧

人

董淞字子壬海寧人博學嗜古薄制義不畜宏治中嘗以
薦詣闕上書萬言敷陳王道命試禮部罷歸家日落室人
交謫晏如也所著有聖學全書真儒蓋語紫陽正脉等書

寧志
備考

王潼字本澄錢塘人幼讀朱子語錄遂絕意舉業聞王守仁講學負笈往從守仁嘉其篤志命其子與之共學潼勤于著述于程子張子遺書皆有補註

武林者舊集

祝萃字惟貞成化甲辰進士授刑部主事改工部治水吳中綜理有方還朝上疏請親禮儒臣以資啟沃詞甚剴切不報乃乞歸養正德壬申起督學陝西副使時大學士楊廷和奪情起用萃疏請保全大臣名節不報尋晉廣東參政遂解官歸年四十萃居家言動必以禮博洽多聞善著書雖象緯數學山經地志醫卜無不旁究許黃門相卿撰

行狀稱爲同里師資

海寧州志

方可立錢塘人九敘從子選貢仕至安慶別駕自爲諸生時以孝友博洽著九敘愛之如已子入仕耿介端方刻苦操勵比歸敝衣冠徒步市中居然古人也

萬歷錢塘縣志

查益字汝謙別號一愚海寧人幼聰穎博極經史尤究心朱子小學之教性嚴毅未嘗苟言笑平生崇正學黜異端遇緇黃之流謝不入若將免已尤好施予族之孤露者爲之謀婚葬後子約貴家稍腴更行于鄉崇祀鄉賢祠

海寧縣志

沈瑞臨字夢錫仁和人少力學動循矩度以古聖賢爲程萬歷五年成進士授行人奉命冊封餽遺屏絕進南京工部郎中二十年陞四川按察司僉事備兵川東以母老乞

終養所部故有美餘千金屬吏致贐瑞臨正色卻之比歸杜門歛迹闡濂洛之書以承絕學當事請主天真書院瑞臨謝不往曰程朱之後聖學已明學者唯以踐修篤實爲本飾浮名事空譚非余所能也家貧不治生產四壁蕭然無異諸生時巡按御史唐一鵬至榻前視臥席敝嘆曰君何困也捐金爲葺其廬瑞臨曰我身雖困而心則亨矣卒辭不受督學伍袁萃重其廉以學田二十畝備饘粥瑞臨謝曰學田爲貧士設余備位憲臬豈所宜有其皞然無所取類如此生平沉潛性命其學本之踐履不事論說所著易義十卷經解二十卷學者爭傳習之稱曰約菴先生孫

從雲有學行袁萃所畀膳田久而無所歸復與從雲從雲
曰吾不忍傷先人志請移于旌德祠爲祀田以廣德意

舊仁

和縣志

卓爾康字去病萬歷壬子舉于鄉授祥符教諭歷陞工部
員外郎左遷常州府簡校徙大同府推官時盧象昇爲總
督爾康建白兵事稍自發舒量移兩淮分司運判歲大祲
爲淮人請賑語切直用是罷歸卒年七十有五

舊仁和爾縣志

康孤峙介特以世道爲已任篤于朋友師事許孚遠而友
高攀龍尤善接少年寒賸鉅公要人片言不合終身不相
往來其學以經術爲本作易學詩經春秋辨義子人臯字

有枚治古文有聲

經義考

呂居恭字覺我海寧人萬歷間貢生講學主誠意無所偏主能息同異之辨遊其門者甚衆所著五經正訛四書疏

解諸書遺稿散逸

舊海寧縣志

陸振奇字庸成生有至性敦孝友工文章與里中鄭徵士之惠馮祭酒夢禎葛太常寅亮虞司勳淳熙爲莫逆交殫心經學弟子環而卒業論難義易辨析不窮歷聘四方于新安說經尤久學者稱庸成先生萬歷丙午舉于鄉著有易芥十卷學庸心性解行世

錢塘縣志

按仁和縣志亦載振奇傳于

國朝文苑卷中謂爲康熙丙午舉人而選舉卷中已列其名於萬歷丙午矣後先矛盾殊失檢核今依錢塘志改正

沈應正字素侯餘杭人有至性父死方十歲哀思不止及壯居母喪素食三年禮節備盡爲諸生淡于進取獨先德義師事同邑李春耕已聞許孚遠倡道往來杭嘉二郡應正與同志姚宏從之遊歸而傳其師說門人益進居沙村當山水之衝道圯圻不可行嘗率鄉人採石葺之曰是亦爲學也沒後遠近往賻數月不絕

餘杭縣志

朱朝瑛字美之海寧人生而沉潛好古力學舉崇禎十三年進士除旌德知縣明年以外艱歸尋遭兵亂遂隱居息

交務以窮經爲事編釋五經多破前儒成說名之曰五經
畧記所與辨質惟同邑張次仲敞廬蕭然不見喜愠

舊海寧縣志

張次仲字元帖海寧人八歲母疾割股而愈已而上官欲
奏旌謝曰童子何知思之尚有餘愧可復以此爲名耶舉
天啟元年鄉試久之不第亦不求仕旣遭喪亂益奮力經
術于詩易二經並有著述與朱朝瑛善其持論間與之殊

然歸趣一也

舊海寧縣志

姚居易字身鵠餘杭人年十二就太倉王士驥受春秋閔
月盡通大義士驥異之後旁涉五經達于治易論易者皆

屈服

餘杭縣志

國朝

柴紹炳字虎臣和人生而端重甫入塾聞正心誠意之旨欣然若有會私集羣兒端坐業師葛岷瞻見而奇之稍長博極羣書爲諸生七試冠軍下筆數千言後居西湖之南屏山鍵戶小樓研窮聖賢體用之學于象緯輿地兵農禮樂以及管田水利靡不窮源究委勒有成書名考古經濟類編又博綜典禮舉經權常變之用本之三禮而參以律令皆輯而論之所著發先儒所未發性至孝痛父卒于官不及含飯每一念及輒過墓林椎心泣血見者隕涕與

兄景明居終身不析箸教子弟悉本躬行自言有得于曾子省身之學題其居爲省軒鄉里稱省軒先生

應搗謙撰傳

應搗謙字嗣寅仁和人爲諸生殫心理學窮極底蘊家甚貧環堵蕭然而弟子日益進立教惟以躬行實踐爲主于六經多所發明尤精于易嘗病世儒言易失之穿鑿歿後巡撫河陽趙士麟刻其性理儀封張伯行刻其潛齋文集行于世

鄉賢留祀冊

母病服勤數年母憐之曰吾爲汝娶婦以

助汝爲謙終不肯入私室母卒除喪始成禮戊午兵部侍郎項景襄舉博學鴻詞力辭不赴子禮璧禮琮從遊于陸

隴其克承其學

舊仁和縣志

沈昀後名蘭先字甸華仁和人父之龍學行著聞蘭先讀書好古究濂洛之學考性命之理日有課月有程每月則宗其所得與同人質疑辨義一以朱子爲宗家甚貧環堵蕭然而澹然自適所著有宋五子要言四先生輯略四書

宗法七經評論

鄉賢留祀冊

陳確初名道永字乾初海寧人父穎伯以文學著確讀書卓犖與同邑祝淵受業于劉宗周聞誠意慎獨之說一隅三反宗周歿盡讀其遺書憬然而喻遂見之論著嘗謂性無不善必盡其才而始見譬之五穀不莠植不耘籽無由知其種之美也而先儒求諸人生以上則過矣又謂大學

層累之序疑出于漢儒桐鄉張履祥山陰劉灼並寓書辨
難顧力持其說莫能奪也確善于議禮度今所可行者變
通古禮以教人疾地師妄言吉凶惑世緩塋嘆爲異端之
禍友朋有過必正色相告聞者諒其誠晚以病廢不出門
者十五年耑意著書多有裨名教

南雷文約

沈應元餘杭庠生淹貫經史身體力行不屑屑文詞章句

晚年益好古手不釋卷

餘杭縣志

倪濤字山友號崑渠錢塘人幼聰穎過目不忘嗜讀書榜
其齋曰蛾術于四部之書無所不窺銳意著述考史傳之
同異六書之源流秦漢以來金石之文字次第編纂貧不

能致鈔胥與其子棠手自繕錄室無斗儲而家人相對訢然以鈔書爲樂後乃專于治經撰周易四尚分辭變象占折衷諸儒之說謂先天後天河圖洛書位置巧合但以陳搏之圖而竟指之爲伏羲先天以孔子之言而反目之爲文王後天則近于僭有河圖而謂伏羲因以作易有洛書而謂神禹因以演疇則近于鑿注釋愈多攻辨遂起因分載六圖于繫辭說卦之後而附以諸家之辨自比于春秋調人識者題之濤性簡靜見人訥然如不能言人亦罕知其學者以歲貢生授遂安訓導老病乞歸年八十餘卒所著書多散佚其存者得七百二十六卷

武林道古錄

童心良字未孩別號抑齋昌化人少穎異博綜淹貫爲邑諸生家貧事親孝嚴取與友教武林從游履滿戶外吳農

祥師事之

昌化縣志

姚際恒字立方號首源仁和諸生少折節讀書泛濫百氏既而盡棄詞章之學專事于經年五十日向平婚嫁畢而游五嶽予婚嫁畢而注九經遂屏絕人事閱十四年而書成名曰九經通論時山陽閻若璩力辨晚出古文之僞際恒持論多不謀而合若璩撰古文尚書疏證屢引其說以自堅而蕭山毛奇齡篤信古文作冤詞與若璩詰難奇齡故善際恒以際恒之同于若璩也則又數與爭論際恒守

所見迄不爲下奇齡嘗與客言小學者六書之學朱子指爲幼儀不知何據際恒應聲曰朱子所據者白虎通也第白虎通亦言字學而朱子借用之因舉唐宋後之稱小學者源委井然奇齡爲嘆服際恒又著庸言錄若干卷雜論經史理學諸子末附古今僞書考持論雖過嚴而足以破

惑學者稱之

武林道古錄

范鯤字北溟號蜀山海寧人性剛正尚氣誼士黨倚重尋棄科名潛究洛閩諸書得張履祥遺稿讀之曰紫陽之後一人矣因編次其集行世鯤制行醇篤居憂一遵古禮喪祭特嚴講求紫陽灰隔法精密無遺憾沒後門人張朝晉

爲營窆安撫其兩孤一時賢之

舊海寧縣志

吳廷華字中林錢塘人學醇論高含咀諸經精洽貫串三禮之學尤爲專家雍正初以乙科官內閣中書舍人出爲福州府海防同知以經術緣飾吏治侃侃不阿暹羅國初入貢以三品服寵其使使旣晉秩欲以屬禮接郡守廷華折之曰春秋之義王人雖微序諸侯上使者秩雖高猶陪臣也使爲悚屈琉球國貢硫磺還必稍挾中土物以歸關吏持之急廷華引周禮環人送迎門關無譏及野廬氏第禁不時不物爲請關吏謝之其居官引經持正多類此久之以疾致仕乾隆元年用大臣薦修三禮廷華曰周禮儀

禮多爲後人參雜宜識其真僞禮記出于漢儒多與古不合當辨其是非註疏舛繆者經有明據則證以經無則集衆說而折衷之總裁諸公頗題其言在館凡十年用力最深其分緝諸圖請發秘府所藏諸儒禮圖得七十餘家詳審同異多所訂正書成晉一級尋歸教授崇文書院以經

學課士

東莊遺集

朱儼思字乾若海寧人爲諸生屢試不第行益醇業益邃于經則漢唐箋疏宋儒傳註靡不畢究復博綜天文輿圖兵刑河渠食貨諸論說裁以己意皆可坐言起行其爲學以存誠爲主有問以決科之要者曰讀書積德人爵自至

如不可求從吾所好其他吾弗知也卒年七十有九

舊海寧縣志

鄭江字璣尺號筠谷錢塘人生有異稟康熙戊戌成進士
改庶常終養居憂未嘗餘竿牘干當事巡撫朱文端公以
此見賞服闋卽薦枝順天鄉試授檢討充明史館纂修兼
一統志纂修官晉贊善視學安徽躬親枚閱風習爲之一
變青陽有娶未婚族孀之武生已廉其實縣令再三請貸
卒治其罪巢縣監生樊珍以爭產誣其弟婦與隣人趙生
通縣令受賕實其事江駁之言之撫軍其事得釋諸生陶
敬信之通經江有龍之史學皆疏薦有龍以親老辭敬信

獻所著書與修三禮人皆服公之能知人秩滿晉侍讀仍
充明史綱目館纂修居一年乞告回籍江所學無不貫尤
邃于經謂春秋非啖趙孫劉諸大儒則聖經或幾乎晦武
夷胡氏頗以已意武斷迂泛不切集諸家之說爲春秋集
義二十卷又爲詩經集詁四卷禮記集註二卷

道古堂集

桑調元字伊佐號駿甫父天顯自餘姚徙家杭州遂爲錢
塘人調元有異才下筆千言屈其儕輩性耿介不妄交人
尤嚴取與之辨雍正四年舉順天鄉試十一年會試後選
選舉人之明習性理者得入人調元與焉

持旨賜進士授工部屯田司主事丁父憂廬墓三載服闋補官釐

正規約吏餽以羨金却不受轉營繕司乞假歸先是調元從父歸姚江受業於儒者勞史傳其學家居輯餘山遺書一以程朱爲法舉以教學者歷主大梁濬源敷文講席興文敦行多所成就

墓志

王雲廷初名金鑣號文山錢塘人雍正丙午舉人國子監學錄研窮性命之學以關洛爲宗身體力行內外如一方之應撝謙柴紹炳諸儒鄉里無間言

雲鑣齋詩話

杭州府志卷九十

終